



# PREZIDÊNCIA KONSELLU MINISTRUS

VIII GOVERNUN KONSTITUSIONÁL

## KOMUNIKADU IMPRENSA

### **Sorumutuk Konsellu Ministrus nian iha loron 21 fulan-agostu tinan 2018**

Konsellu Ministrus hala'o sorumutuk iha Palásiu Governu, iha Dili, no aprova ona Proposta kona-ba Rezolusaun Governu nian, ne'ebé apresenta husi Primeiru-Ministru, Taur Matan Ruak, kona-ba nomeasaun Xanana Gusmão hanesan Representante Espesiál Timor-Leste nian atu konklui prosedimentu hirak ne'ebé presiza ba ratifikasaun Tratadu entre Repúblika Demokrátika Timor-Leste no Austrália ne'ebé estabelese ketan tasik iha Tasi Timor, akizisaun interese iha kampu petrolíferu sira no selebrasaun akordu sira kona-ba dezvoltamentu kampu petrolíferu sira *Greater Sunrise* nian. Representante Espesiál ne'e sei representa Estadu Timor nian iha kestaun sira ne'ebé relasiona ho Tratadu ne'e rasik, sei negocia ho hanoin atubele adkire interese partisipativu iha ativu petrolíferu balun iha Tasi Timor, ne'ebé maka hein katak bele fó kontribuisaun ho forma desizivu ba dezvoltamentu indústria petrolífera moderna ida iha Timor-Leste no, tuirmai, ba dezvoltamentu indústria sira seluk no setór ekonómiku sira ne'ebé iha relasaun. Representante Espesiál ne'e mós sei lidera prosesu negosiasaun no selebrasaun ho Austrália no ho empresa petrolífera, akordu sira ne'ebé presiza ba dezvoltamentu kampu Greater Sunrise, afirma fila-fali intensaun Governu nian atu kampu Greater Sunrise desenvolve liuhusi dada kadoras gás natural nian ba parte tasi mane Timor-Leste nian no ba konstrusaun no operasaun fábrica prosesamentu gás natural nian iha Beasu.

Konsellu Ministrus aprova ona Proposta kona-ba Rezolusaun Governu nian ne'ebé apresenta husi Ministru Negósius Estranjeirus no Kooperasaun, Dionísio da Costa Babo Soares, kona-ba nomeasaun Tomás Cabral, hanesan Representante Espesiál Governu RDTL nian ba Repúblika Giné-Bisau atu halo identifikasaun kona-ba nesesidade Estadu ida-ne'e nian atu hala'o eleisaun ne'ebé livre no demokrátika ne'ebé sei realiza iha loron 18 fulan-novembru tinan 2018. Hodi rekoñese kontributu importante ne'ebé misaun apoiu nian rua husi Timor ba prosesu eleitorál



Palácio do Governo,  
Avenida Presidente Nicolau Lobato,  
Dili, Timor-Leste

pcm.gov.tl@mail.com  
(+670) 33 310 608

Giné-Bisau nian, ne'ebé harii iha tinan 2013 no 2014, fó ona atu hala'o eleisaun livre no justu iha país ida-ne'e, atu nasaun ne'e fila-fali ba normalidade demokrátika no atu RDTL hetan prestíjiu internasionál, no hodi afirma determinasaun Governu Timor-Leste nian atu kontribui ba pás no seguransa internasionál, liuhusi fó apoiu ba asaun sira ne'ebé promove konsolidasaun rejime demokrátiku sira, respeito ba direitu umanu no fortalesimentu Estadu sira ne'ebé Timor-Leste mantein relasaun amizade no kooperasaun nian ho sira.

Konsellu Ministrus analiza ona Proposta kona-ba Rezolusaun Governu nian ne'ebé iha relasaun ho pagamentu kontribuisaun sosiál ne'ebé sai hanesan obrigasaun traballadór Estadu nian sira, ne'ebé apresenta husi Ministra Solidariedade Sosiál no Inkluzan, Armanda Berta dos Santos. Proposta ne'ebé apresenta ne'e buka atu define senáriu hirak ne'ebé bele mosu ba retensaun mensál ba Seguransa Sosiál no pagamentu kontribuisaun sosiál globál sira husi traballadór Estadu nian sira. Rejime kontributivu Seguransa Sosiál vigora ona dezde loron 1 fulan-agostu tinan 2017. Tuir fali mai Konsellu Ministrus sei analiza fila-fali proposta ne'e.

Governu aprova ona Projetu kona-ba Deliberaun Konsellu Ministrus nian ne'ebé hili eis-Prezidente Repúblika no Konselleiru Estadu, Kay Rala Xanana Gusmão, atu reprezenta Governu iha [serimónia fúnebre eis-Sekretáriu-Jerál Organizaun Nasoins Unidas, Kofi Annan](#), nian, exetu karik serimónia sira-ne'e iha karáter privadu, ka iha serimónia omenajen póstuma ba ninia memória ne'ebé maka sei realiza. **REMATA**



Palácio do Governo,  
Avenida Presidente Nicolau Lobato,  
Dili, Timor-Leste

pcm.gov.tl@mail.com  
(+670) 33 310 608